



Ingelise Olesen,  
Nanna Lund Hansen,  
Christina Viskum Lytken Larsen

# IMMERSOQATIGIIFIUSUMIK ISUMMERSOQATIGIINNEQ (SHARING CIRCLE) KALAALLIT NUNAANNI

Periutsimut najoqqtassaq





**Immersoqatigiiffiusumik**  
**isummersoqatigiinneq (Sharing Circle)**  
**Kalaallit Nunaanni**  
*Periutsimut najoqqutassaq*

Ingelise Olesen,  
Nanna Lund Hansen og  
Christina Viskum Lytken Larsen

Innuttaasut Peqqissusiannik Ilisimatusarfik

Layout: irisager.gl



# IMARISAI

<b>1. TUNULIAQUTAQ .....</b>	<b>4</b>
<b>2. PERIUTSIMIK ILISARITITSINEQ .....</b>	<b>6</b>
MISISSUIFFIGINEQARTUNIK ATAATSIMOORTITSILLUNI APERSUINEQ ILOQQA-SUNNGORLUNI ISUMATTORSAQATIGIINNERMUT ILLUATUNGIVIULLUGU .....	6
KALAALLINUT ATAQATIGISSIONNERA .....	7
INUIT, NALEQARTITAT, ILISIMASAT AAMMA PEQQISSUSEQ .....	7
KALAALLIT ULLUMIKKUT NALEQARTITAAT .....	8
ILOQQASUNNGORLUNI ISUMATTORSAQATIGIINNEQ PERIUTSITUT KALAALLIT NUNAANNI ILISIMANEQARPA? .....	9
PERIUSISSERTAT ISUMALIUTERSUUTIT .....	10
<b>3. PERIUTSIP ATORNEQARNERANI .....</b>	<b>13</b>
PIAREERSAATIT – TULLERIIAAQQISSAAKKAT .....	14
PERIUTSIP IMMIKUUALUTTORTAI .....	15
1) ERINARSORNEQ QASUKKARSAATITUT .....	15
2) AQUTSISOQ ILOQQASUMI PEQATAASUTUT .....	15
3) NALEQARTITANIK AALLARNIUTITUT OQALUUSERINNINEQ .....	16
4) OQALUNNERMI TIGUMMIARTAGAQ .....	16
ATORNISSAANUT ILITSERSUUT - TULLERIIAAQQISSAARLUGIT .....	17
<b>4. PERISEQ PILLUGU ISUMALIUTERSUUTIT .....</b>	<b>18</b>
<b>5. EQIKKAANEQ .....</b>	<b>20</b>
<b>NAJOQQUTAT .....</b>	<b>22</b>

# 1. TUNULIAQUTAQ

Innuttaasut Peqqissusiannik Ilisimatusarfiup 2019-imi aamma 2020-mi suliniutini assigiinngitsuni marlunni *Sharing Circles (kingorna Immersoqatigiiffiusumik isummersoqatigiinnermik taagorne-qartoq)* periutsitut atorpaa. Suliniummi siullermi "Kalaallit Nunaanni peqqinnissaqarfik atuisut isaannit isigalugu"-mi misissuiffigineqartunik itisiliilluni apersuineq misissuinerup ilusaanut ilaaqqaarpoq.

Peqqinnissaqarfimmilli atuisut misilittagaanik misissuinermi, Olesen et al., (2020), inuit misilit-tagaat, ajunngitsut pitsaanngitsullu, aamma isiginninnerat qitiutinneqarmata pingaarutilittut isigineqarpoq kulturikkut oqaatsitigullu toqqissimanartumik akuutitsiffiusumillu tunngaveqar-nissaq, kiisalu kulturikkut aallaavilimmik peqqinnermik paasinninnermik paasinninnissaq.

Nunani issittoqarfinni allani ilisimasatigut misilittakkatigullu nassuarneqarpoq nunap inoqqa-visa misissuiffigineqarnerini attaveqaqatigeeriaatsit aamma ileqqut akuersaartumik pissuseqar-figineqarnissaasa pingaaruteqassusiat (Halcomb, 2006).

Taamaattumik amerikap avannaani periuseq *Immersoqatigiiffiusumik isummersoqatigiinnej* isumassarsiorfigineqarpoq, kalaallit kulturiannut ileqqinullu naleqquttumik misissuiffigineqar-tunik apersuinermit atorsinnaasamik allaanerusumik isumassarsiniarluni. *Immersoqatigiiffiusu-mik isummersoqatigiinnej* aallaqqaammut misissuinernut periusunngikkaluarpoq, kisiannili ileqqutoqqat malillugit attaveqaqatigeeriaasiulluni Canadami, Alaskami aamma USAmi inuuner-mi oqaluuserisassanik annertuunik annikitsunillu oqaluuserinninnissamik pisariaqarttsisoqartil-lugu atorneqartarsimasumik (Rothe et al., 2009, Halcomb, 2006, Earth Child Project, 2020).

Misissuinermi pineqartumi paassisutissanik pissarsiffit peqatigalugit sammineqartut ilaannik eqqartuinermut periaaseq taanna pitsaallunilu kingunilimmik periususoq paasinarsivoq. Periu-seq aamma itisiliilluni misissuinermi allami, Qasigiannguani ingerlanneqartumi, *Immersoqatigiiffiusumik isummersoqatigiinnermik* (Olesen et al., 2020b) taamaallaat ilusilerneqartumi, misile-rarneqarpoq. Tassani aamma periutsip pitsaaquteqarnera, suliareqqinnissaanik soqutiginaate-qartumik, takuneqaqqippoq.

Najoqqutassiornermi matumani siunertarineqartoq tassaavoq ilisimatusati-galugu misissuineri taaneqartuni *Immersoqatigiiffiusumik isummersoqatigiinnej* periutsitut qanoq atorsimaneripput nassuiassallugu, Kalaallit Nunaanni siunissami ilisimatuussutsikkut misissuinerntu periutsip atorneqarnissaanik isumassarsisitsisimassalluta neriuutigalugu. Tamatuma saniatigut misissuineri taakku-nani marlunni misilittakkat takusallu nassuarneqarput. Neriuppugut najoqquaq una ilinniartut aamma ilisima-tusartut inuaqatigiit kalaallit oqaloqatigalugit peqqis-sutsikkut- aamma inooqataanikkut tunngasuni sulia-qarnerminni isumassarsiffagalugulu, ilitsersuutigalu-gulu iluaqtigisinnaaassagaat.

**Misigissutsit, misigisat  
aamma inuunermik  
isiginnittaaseq pillugit  
oqaluuserinninnissamut  
ilisimatuussutsikkut  
periutsimik kulturimut  
naleqqussaaneq**




## **2. PERIUTSIMIK ILISARITITSINEQ**

Halcombip (2006) allaaserisaanik misissuinermi nassuiarneqarpoq paasissutissanik pissarsiffiit allanik oqaaseqarlutillu kulturikkut tunuliaqtallit akornanni misissuiffigineqartunik apersuineq ilisimatuussutsikkut periutsitut atussallugu tulluartuusoq (Halcomb, 2006). Matumanili oqaatigineqarpoq misissuiffigineqartunik apersuinernik ingerlatsinermi inuiaqatigiinni nunani killernisut kulturikkut oqaatsitigullu tunuliaqtaqangitsuni kulturimut tunngasut eqqumaffigissallugit pingaaruteqarluinnartut, tassunga ilanngullugit malittarisassat, attaveqaqatigeeriaatsit aamma ileqqutoqqat. Taamaattumik paasissutissat pitsaassusiannut aamma misissuinerup atorsinnaasusianut misissuiffigineqartunik apersuinermi periutsinik nalinginnaasunik naleqqussaanissaq pingaaruteqarpoq. Tamatumunnga ilanngullugu oqaatigineqarpoq aqutsisoq marluinnik oqaasilik illuatungeriit akornanni kulturikkut oqaatsitigullu paaseqatigiinnerunissamut, kiisalu eqimat-tami naligiinnerusumik avatangiiseqarnissamut sunniuteqarsinnaasoq, taamaalillunilu taperser-suinerusutut aamma kajumissaarinerusutut sunniuteqarsinnaalluni. Eqqumaffigissalluguli pingaaruteqarpoq kulturikkut ataatsimut isiginnilluni isummerneq tamanut eqqortuousutut isigine-qassangimmat. Inuttut misilitakkat aamma naleqartitat inuit ataasiakkaat kulturimik paasin-ninnerannut pissutaaqataapput (Halcomb, 2006).

### **MISISSUIFFIGINEQARTUNIK ATAATSIMOORTITSILLUNI APERSUINEQ IMMERSOQATIGIIFIUSUMIK ISUMMERSOQATIGIINNERMUT ILLUATUNGIULIULLUGU**

Misissuiffigineqartunik ataatsimoortitsilluni apersuinerup ilisarnaatigaa aqtsinerunngitsumik ingerlanneqartarnera, aammalu siunertarineqartarluni sammineqartoq pillugu isummersuutit assigiinngitsut amerlasuut qaffakaatinneqarnissaat. Paasissutissanik pissarsiffiit eqimattami aqutsisumit aqunneqassapput, pingarnertut sammineqartut pillugit oqallillutillu namminneq isummersorlutillu akissuteqartassallutik. Taamaalilluni misissuiffigineqartunik ataatsimoortitsilluni apersuineq ilisimatusarnermi periutsitut paasineqassaaq, sammisaq ilisimatusartup toqqagaa tunngavigalugu eqimattat sunniivigeqatigiinnerannit paasissutissat pissarsiarineqassallutik. Periuseq inooqatigiinnermi ineriarornerit imamikkut aalajangersimasumik qanoq nassuiarneqartarnerannut paasissutissanik pissarsinissamut aamma tulluartuuvooq (Halkier, 2002).

Misissuiffigineqartunik ataatsimoortitsilluni apersuineq paasissutissanik pissarsiffiit isumaannik misigisaannillu ataatsimoortumik paasinninnermik pilersitsisinnaavoq. Apersuisumulli unammilli-gassaasinjaasoq tassaavoq paasissutissanik pissarsiffiit tamakkerlutik oqaaseqarnissaat isuma-gissallugu. Aammattaaq misissuiffigineqartunik ataatsimoortitsilluni apersuinermi atugassariti-tat ilagivaat paasissutissanik pissarsiffiit oqaaseqaataat eqimattami paasissutissanik pissarsiffiit allat, immaqa nammineq ilisarisimanngisat, isumaannit sunnerneqarsinnaanerat. Tamatuma kingunerisinnaavaa assersutigalugu namminneq isummernissaraluartik oqaatiginngiinnaraat, eqimattap iluani allat isumaannit allaanerunera pissutigalugu (Kvale and Brinkmann, 2009). Tassa imaappoq misissuiffigineqartuni ataatsimoortuni inuit akunherminni nakkutiginninnerat pissutigalugu misilitakkat isummersuutillu assigiinngitsut oqaatigineqarnissaraluat pinngitsoor-tinneqarsinnaasoq (Halkier, 2002).



**Avitseqatigiinneq  
tatiginninnermik  
ataqqinninnermillu  
pisariaqartitsiffiuvoq**

*Immersoqatigiiffiusumik isummersoqatigiinneq* periutsitut ammasumik oqaloqaloqatigiinneruvoq, oqaluttuarnermik ataqqinniffusoq (Tachine et al., 2016). *Immersoqatigiiffiusumik isummersoqatigiinneq* ajornaatsunnguuvoq, peqataasut iloqgasunngorlutik isummersuutiminnik, misigissutsiminnik aamma misigisaminnik avitseqatigiiffiat. Peqataasut tamakkerlutik ammarlutik avitseqatiginnippata amerlasuutigut peqataasut akornanni inuttut imminnut naleqqiussinnaanngorlutik akunaquteqannngitsumik toqqisisimaneq pinngortarpooq (Rothe et al., 2009, Earth Child Project, 2020).

*Immersoqatigiiffiusumik isummersoqatigiinnermut* imaluunniit Talking Circlesimut ataatsimoorutaasoq tassaavoq sammisat ilaannik oqaluuserinninnissamut peqataatisinermik pilersitsisinnaaneq, aamma unammilligassaasinaasunik tapersersuerpalaartumik aporaaffiunngitsumillu qaangiiniarniarsinnaaneq (Earth Child Project, 2020). Oqaloqatigiinneq qinoqatigiinnermik imaluunniit ileqqulersummik nalliuottorsiorpalaartumik, kulturikkut attuumassuteqarfigisamit aallaaveqartumik, amerlasuutigut aallartinneqartarpooq.

Taassuma misissuinermi periutsitut atorneqarnerata pingaarutaa tassaavoq nunap inoqqaavisa (*Indigenous Peoples*) namminneq oqaluttuarisaanerminnik, misigisartakkaminnik aamma inuunerminnik ilisimaarinnittuusutut akuersaarneqarnissaat, aammalu ilisimasap tamatumaa pitsaunerpaamik piuminarsarneqarnissaa (Tachine et al., 2016). Nunat inoqqaavi amerlasuut *Immersoqatigiiffiusumik isummersoqatigiinnermik / Talking Circlesimik* imaluunniit oqaluttaqattaanermik ileqqoqarput, ulluinnarni pisarnertik malillugu aamma attaveqaqatigeeriaaseq taamaattoq atorlugu namminneq kulturiminnik, ileqquminnik aamma inooriaatsiminnik ingerlatitseqqinissaminnut ilinniartitsinissaminnullu ilaattilugu (Kelley and Lowe, 2018). Matumani iloqqasooq inuunermut, peqqissinermut, oqimaatigiinnermut aamma nakooqqummut ilisarnaatitut isigne-qarpoq, aamma unammilligassanik qaangiiniarnermut atortutut atorneqartarluni (Grahamslaw and Henson, 2015).

## KALAALLINUT ATAQATIGIISINNERA

*Immersoqatigiiffiusumik isummersoqatigiinnerup* Kalaallit Nunaanni ingerlanneqarnerani uagutsinnut pingaaruteqarluinnarpooq *Immersoqatigiiffiusumik isummersoqatigiinneq* atortussatut piareeriikkatut isiginagu isumassarsiorfittut isigissallugu. Oqaatigineqareersutut *Immersoqatigiiffiusumik isummersoqatigiinneq* attaveqaqatigeeriaasiuvoq, Issittumi nunat inoqqaavisa akornanni ileqqutoqaalluni, Kalaallit Nunaannili ilisimaneqarani. Taamaattumik periutsip ilisarnaatai immikkualuttortaalu atorlugit kalaallisumut atassuserlugu misilerarusupparput. Immitsinnut aperivugut, suut atussallugit pissusissamisuusanersut aamma naleqartitat attaveqaqatigeeriaatsillu qanoq ittut tunuarsimaarfigissallugit pingaaruteqarnersut, *Immersoqatigiiffiusumik isummersoqatigiinneq* Kalaallit Nunaanni ingerlakkusukkutsigu. Isumalitiginninnitsinnut pingaaruteqarluinnartoq tassaavoq ilisimatusartutut Kalaallit Nunaanni inunngorsimasutut, imaluunniit ukiorpassuarni nunami maani sulinikkut ilaqquttat najugaqatigalugit kalaallit kulturiannik aamma peqqissutsimik inuunerissaarnermillu isiginninnermik paasinnilluarsimanissarput.

## INUIT, NALEQARTITAT, ILISIMASAT AAMMA PEQQISSUSEQ

Inuit inuunermik isiginnittaasiannut, aamma silarsuarmik paasinninnerannut oqaatsinut kulturi-lumullu, taamatullu aamma naleqartitanut atassuteqarluinnarpooq (Kvale and Brinkmann, 2009). Suut pingaaruteqartuunerannik aamma kissaatiginartuunerannik naleqartitat kulturikkut aalaja-

ngeriikkamik isummernerupput. Inuit isummanik aamma naleqartitanik peroriartornerminnut sunniuteqarsimasunik pigisaqartuupput. Kulturi ilaatigut peqqinnej, nappaatit aamma kinaassuseq pillugit paasinnittariaatsitsinnut pingaaruteqarpoq (Wistoft, 2009).

Oqaatsip peqqinnerup danskisut nutserneqarnera tassaavoq peqqinnej. Peqqinnej suup inissa-miniinneranut tunngavoq, taamalu napparsimanerup akerliatut peqqinnermut nunani killerni paasinnittaatsip assinganut tunnganani (Wistoft, 2009). Peqqinnej pillugu paasinninneq ataatsimut isiginnilluni peqqinnermik paasinninneruvoq, naleqartitanik, atassuteqaqatigiinnermik, avatangiisimik, kalaaliminernik aamma misilitakkanik tunngavilik.

Wistoft (2009) naapertorlugu peqqinnej naleqartitanut makkununnga aamma tunngavoq; tunuarsimaarnermut, ataqqinaammut, nakuussusermut, ataqqinninnermut aamma sumut angisuumut inuup soriarsinnaangissusianut, soorlu Silamik akuersaarnermut, kiisalu aquassinnaangnisat naleqqussarfiginissaannut piumassuseqarnermut. Inuaqatigiit inuit pileqqaarneranni aporaannerit oqaluuserineqarneq ajorput, aaqqiagiinnginnerit inuaqatigiinni mikisuni immikoortitsinermik kinguneqarsinnaammata, tamannalu ataasiakkaat inuugginarsinnaanerannut unammillagassaqalersitsisinnalluni. Pitsaasumik inooqatigiinneq, taamalu aamma tunuarsi-maareq ullumikkut suli kalaallit kulturianni naleqartitat qiterivaat (Wistoft, 2009).

Naleqartitat malittarisassallu oqaluttuat ileqqutoqqallu aqqutigalugit ingerlateqqinnejqarsimautut isigineqarput (Wistoft, 2009). Inuk peqqissuussappat tarneq, qaamaneq aamma inuk *pinngortitami* inissaminiissappat. Tamatumma saniatigut anersaaq inissaminiissaq. Timi anersaarlu imminnut ataqtigiippu. Pinngortitamik asanninneq, akuersarneq aamma ataqqinninneq inuup pissuserisinnaasaani peqqinnarnerpaatut isigineqarpoq (Wistoft, 2012).

**”’ anersaaq ilanngunnagu timi tarnilu ataatsimoortutut  
isigissagaanni assigaa inuk niaqoqanngitsoq.  
Kulturikkut kinaassutsitsinnut anersaaq ilisarnaataavoq  
- kalaaleq utoqqaq**

Inuit silamik, inummik aamma peqqinnermik taaguutaat inuaqatigiinni inuit naleqartitaannik perorsarneqarsimallutillu atuisuusuni arlalitsigut aporaaffiusinnaasoqarsorinarlunilu akerleriissuttaasinnaasoqarsorinarpooq, assersuutigalugu peqqinnissakkut aaqqissuussaaneq tamakiisumik isigalugu nunani killerni peqqinnermik- aamma napparsimanermik paasinninnermik isumaqr-tinneqarmat (Wistoft, 2012).

## KALAALLIT ULLUMIKKUT NALEQARTITAAT

Kalaallit Nunaanni misissuinerni nutajunerusuni, naleqartitanik aamma kulturimik samminnif-fiusuni, inuunermik aamma peqqinnermik paasinninneq suli ataatsimut isiginnilluni paasinninne-rusoq takutitsippu. Nunaqqatigiinnut sammititamik suliniummut Paamiut Asasaramut, ukiuni tallimani ingerlanneqartumut, tunngatillugu apersuilluni misissuinerit ingerlanneqarput, innuttaasut naleqartitaat sammineqarlutik. Kulturikkut naleqartitat assigiinngitsut, tassunga ilanngulugit ataqqeqatigiinneq, pinngortitaq aamma kalaalimerngit paassisutissanik pissarsiffinnit erseqqissaatigineqarput. Atugarissaarnermi atugarliornermilu ilaqtariit pingaaruteqassusiat tamanit naleqartitarineqarpoq (Berliner and Stender, 2013). Kalaallinut tunngatillugu ilaqtut aamma ataatsimoornerup pingaaruteqassusiat allaaserisani ersersinneqaqqippoq (Rink and Trondheim, 2018, Berliner and Stender, 2013, Olesen et al., 2020a, Petersen, 2003). Kalaallit

ilaqutariit naleqqussarlutik peqaa-taatisiffiumik amerlasuujusarput. Ilaquttanut qanittumik attaveqarnaq aamma ataatsimoorerit nikallunganissamut illersuuttitut isigineqarput, atassuteqarnerlu taanna aliasuutinik nuannaarnernillu avitseqatigiiffiusarluni. Taamaattumik suliani ingerlanneqartuni tamani ilaqtariit tamarmiusut eqqarsaatigineqartarnissaat pingaaruteqarpoq (Reimer Trondheim, 2012).

Suliniummut Paamiut Asasaramut atatillugu aalisarnermik piniarnermillu aasaa-nerani højskolertitsisoqarpoq. Tassunga atatillugu peqataasut eqqarsaatersuutaat allaaserineqarput, ataatsimoorermik ataqqinninnermut, nammimeq nakuussusermut aamma tunniussinnaasanut pisinnaasanullu, inuit akunnerminni aamma avatangiiserisanut ataqqinnittussaanermik, tessunga ilanggullugit uumasunut pinagassanut, aamma inuunerissaarnermik pilersitsinissamut nukimmik oqimaaqatigiissuusussamik pilersitsisussaasunut. Oqimaaqatigiinneq taanna piujuartitsinerrik aamma kinguaariit tulliuttut inuunerissaarnisaannik qulakkeerininnermik pilersitsivoq (Berliner and Stender, 2013). Ataqatigiinneq taanna aamma Canadami Nunavumi Inuit akornanni inuunerissaarnermik misissuinermi takuneqarpoq. Tassani inerniuliussaq tassaavoq inuunerissaarneq, pilluarneq aamma peqqissutut misigisimaneq ilaquttanut qanimut attaveqarnermut, ilaqtanik oqaloqateqartarnermut, nerisassanik avitseqatigiillnilu nereqatigiittarnermut, kiisalu peqatigiilluni pinngortimiittarnermut atassuteqartoq (bid.) Taamatuttaaq Steenholdtip (2019) oqaatigivaa, Kalaallit Nunaanni nalinginnaasumik inuunerrik iluarismaarinnermut pingartumik pinngortitaq pingaarutilimmik inisisimasoq, tamanalumi aamma Issittumi inuuniarnikkut pissutsit pillugit allaaserisanut piusunut aamma ilisimatursarnernut uppernarsaataapput. Tamanna, pinngortitamut atassuteqarnerup saniatigut, inoo-qaatigiinnikkut, assigiinngitsorpassuarnik imalimmut, ataqatigiissutaavoq sakkortooq (Steenholdt, 2019).

**Kalaallisut oqaaseq**  
**Peqqinneq danskisut oqaatsimut**  
**peqqinnermut nutserneqartarpoq,**  
**kisianni oqaaseq inuunermik,**  
**nukimmik aamma ilorrisimaarnermik**  
**siammasissumik paasinninnermik**  
**tunngaveqarpoq**

## **IMMERSOQATIGIIFIUSUMIK ISUMMERSOQATIGIINNEQ PERIUTSITUT KALAALLIT NUNAANNI ILISIMANEQARPA?**

*Immersionatigiifiusumik isummersoqatigiinneq* taaneqareersutut Amerikap Avannaani ilisimaneqarlunilu atorneqartarpoq, kalaallili peqqissutsikkut ilisimatusarfingeqarneranni siusinnerusukkut atorneqarnikuunani. Nunani avannarpasinnerusuni iniuqatigiit qanoq nuttarlutillu angalasarsimanerat, kiisalu Alaskami, Canadami aamma Kalaallit Nunaanni inuit oqaatsitigut kulturikkullu annertuumik assigiissuteqarnerat (Inuit Circumpolar Council, 2020), qiviarlugu isumaqarpugut periuseq Kalaallit Nunaanni siusinnerusukkut arlaatigut atuuttuusimanersoq misissussallugu pissanganartuusoq.

Sammisaq pillugu oqaluttuarisaanikkut allaaserisanik aamma allaaserisanik databaseseni ujarlernermi *Immersionatigiifiusumik isummersoqatigiinneq* Kalaallit Nunaanni siusinnerusukkut atorneqarsimanersoq nassaarfuiungilaq. Utoqqaanerusunut aamma suliassaqfimmik ilisimasalinik, tessunga ilanggullugit itsarnisarsiooq aamma Ph.d. Pauline Kleinschmidt Knudsen Nunatta Katersugaasivianeersoq aamma Oqaasileriffimmi siusinnerusukkut pisortaq soraarneq Carl Chri-

## **Immersoqatigiiffiusumik isummersoqatigiinneq = Sharing Circle**

stian Olsen (Puju), marluullutik Issittumi nuit oqaasiinik kulturiannillu ilisimasaqarluartut, aammattaaq uppernarsarpaat ataatsimoorluni attaveqaqatigeeriaaseq taamaattoq pillugu Kalaallit Nunaanni allaaserinnitoqarsimangitsoq.

Tassa *Immersoqatigiiffiusumik isummersoqatigiinneq* kalaallinut tunngatillugu nutaarluinnaavoq. Taamaattumik periuseq inuiaqatigiinnut kalaallinut nutaalialasunut, kulturimut aamma naleqartitanut tulluarsarlugu allaaserisat aamma ataatsimoorluta ilisimasavut aamma misilitakkavut atorpavut.

Periuseq *Sharing Circles* kalaallinut tunngatillugu siusinnerusukkut atorneqarnikuunngimmat aamma taaguut ilisimaneqanngimmat isumarpugut periutsip '*Sharing Circle*'-p isumaanut aamma siunertaanut naleqquuttumik kalaallisut taagummik tulluartumik nassaarnissaq pingaaruteqartoq. Tamanna aammat-taaq periutsip iluatsilluarnerusumik atulernissaanut pilersitseqataasinnaavoq.

Taamaattumik *Sharing Circlemut* kalaallisut taaguut periuseq pillugu ilisimatuuussutsikkut allaaserisat aamma oqaatsinut tunngatillugu isumaliutersuutit tunngavigalugit aamma '*Indigenous ways of knowing*' (*Nunat Inoqqaavisa ilisimasaqariaasiat*) imaluuniit '*Indigenous knowledge*', umassusiltsigut, timikkut, kulturikkut aamma anersaakkut misilitakkat aamma oqaluttuat atorlugit kinguaariit akornanni ingerlateqqinnejartarsimasut tunngavigalugit silarsuarmik isigin-nittaaseq ataqqillugu suliarineqarpoq. Kiisalu aamma inuit ataasiakkaat namminneq inuunermiinut ilisimaarinilliuartuunerat ataqqillugu. **Immersoqatigiiffiusumik isummersoqatigiinneq** ilisimasanik ataatsimoorluni paarlaasseqatigiinnermik aamma ingerlatitseqqinnersik' nas-suiarneqarsinnaasoq ilisimasanik ataatsimoorluni ingerlatitseqqinnissamik periarfissamit aallaaveqarpoq, taamaattumillu ilisimasanik, ilikkagassanik, paarlaasseqatigiinnermik, ataqqinninnersik aamma akuersaarnermik ataatsimoorluni

## **PERIUSISSATUT ISUMALIUTERSUUTIT**

Nassuaatigineqareersutut periusissat ilusissaat pillugit oqaloqatigiinnernut suliaqarnernullu pif-fissaq annertooq atorsimavarput, misissuiffingineqartunik aamma *Immersoqatigiiffiusumik isummersoqatigiinnermik* ilisimasanik aallaaveqartumik, aamma tamatuma saniatigut Kalaallit Nunaanni itisiliilluni misissuinernit misilitakkant aallaaveqartumik, kiisalu attaveqaqatigiinneq, oqaluttuarisaaneq, naleqartitat aamma ataatsimoorneq pillugit oqaloqatigiinnerit amerlasuut ingerlassimallugit.

Misissuiffingineqartunik ataatsimoortitsilluni apersuinerterik periuseq Kalaallit Nunaanni misissuinerterik arlalinni atorneqartarnikuuvooq, aammalut misissuinerterik aamma innuttaasut akornanni isummersuutinik pingaarutilinnik pilersitsismalluni. Taaneqareersutut allaaserisani aamma nas-suiarneqarpoq periuseq inuiaqatigiinni inissisimaffinni assigiinngitsuni atussallugu piukkunnar-tuusoq, kulturimulli tunngasutigut eqqumaffiginnissap pingaaruteqassusianik oqariartuut immikkut maluginiarparput (Halcomb, 2006). Kalaallit naleqartitaasa tunuarsimaarnermik, inoo-qatigiilluarnissamik, ataatsimoornermik ataqqinnittuunermik kiisalu inuit akunnerminni aamma avatangiiserisanut ataqqinninnissap pingaaruteqassusianik (Wistoft, 2009, Berliner and Stender, 2013) ullumikkut suli sunnersimaneqarnerat isigalugu misissuiffingineqartut ataatsimoortillugit apersuinerterik oqillisigineqarsinnaasut allaanerussasut, kiisalu apersoneqartutut inissisimanerup sapingnisamik minnerpaamik salliuutinnejarnissaa kissaatigisimavarpuit.

Tine Curtisip, ukiuni amerlasuuni Kalaallit Nunaanni ilisimatusarnermik suliaqarsimasup, aamma ilaatigut Kalaallit Nunaanni napparsimasut aamma nakorsat akornanni sunniivigeqatigiittarnermik samminnittumik Ph.d.-nngorniutigalugu allaatiginnissimasup oqaatigivaa Kalaallit Nunaanni misissuiffigineqartunik ataatsimoortitsilluni apersuinermerk periutsip tungaviinut tunngatillugu misissuiffigineqartunik apersuinerup ingerlannissaajornakusoorsimasoq (Curtis, 2001).

” Misissuiffigineqartunik ataatsimoortitsilluni apersuineq uannut atorsinnaannigilaq. Immaqa ilaatigut ilisimatusartuunera aamma danskiunera pisssutigalugit; tamanna peqataasut isummersuutiminik akunnerminni oqaluuserinninnginnerannut sunniuteqarsimagunavippoq – akerlianilli utaqqisutut pissuseqarlutillu apeqqutigisakka ataasiakkaarlutik akisarlugit’ – *Curtis, inuttaanit paasitinneqarneq*

Nassuaatigineqareersutut misissuiffigineqartunik ataatsimoortitsilluni apersuineq isummat eqimattami peqataasut allat isumaannit allaanerusut ilaatinneqarnissaannut tunngatillugu unammiligassaqarsinnaavoq (Halkier, 2002). Tamanna aamma Tine Curtisip misilittagaqarfigivaa:

” misilittakkakka Kalaallit Nunaanneersut naapertorlugit isumaqarpunga amerlasuut ammavallaartumik allanut akerliliinissaminnut suli tunuarsimaassasut, ingammik suullunniit pillugit allat qanoq isumaqarfinginnissinnaanerannut tunngasunik.  
– *Curtis, inuttaanit paasitinneqarneq*

Periutsimik taassuminnga atuinermi kulturikkut naleqartitat aamma peqataatisiffiusumik isummersorneq *Immersoqatigiiffiusumik isummersoqatigiinnermi* akuersarneqarnerujussuupput, naligiimmik atassuteqarnerit aamma maniguunnerup ataqqeitatigiinnerullu sallitutinneqarnerat pissutigerpiarlugu (Rothe et al., 2009).

Ilisimasat katarsorneqarsimasut kiisalu ilisimatusaqatigiit akornanni oqaloqatigiinnerit tunngavigalugit kalaallisut *Immersoqatigiiffiusumik isummersoqatigiinneq* qanoq ilisarnaateqassanersoq, aamma tamanna qanoq ingerlanneqassanersoq naliliisinnaasorivugut.

Periuseq *Immersoqatigiiffiusumik isummersoqatigiinneq* pillugu Rothe et al., (2009) allaaserisaannik misissueqqissaareernerup kingorna immikkuualuttortanik toqqaavugut, uagut nammineq ilusiliinittsinnut ilangngussassatut imaluunniit suliareqqitassatut atugassatsinnik. Rotheperallaaserisaani nunani killerni apersuinermeri aamma misissuiffigineqartunik ataatsimoortitsilluni apersueriaatsit *Immersoqatigiiffiusumik isummersoqatigiinnermi* ilisarnaatinut sanilliunneqarput. Taamaaliornikkut periutsinik isumaliutiginninnermi pitsaasumik tamakkiisumik isiginnissinnaaneq pilersinneqarpoq. Misissuiffigineqartunik ataatsimoortitsilluni apersuinermit immikkuualuttortanik illersorneqarsinnaasumik qaqugukkut atuisoqarsinnaava, aamma qaqugukkut kulturikkut attuumassuteqarnerusut atorneqarsinnaappat.

Suut ilisimasaqarfingineqareerpat, aamma suna anguniarpapput?



# 3. PERIUTSIP ATORNEQARNERANI

Nassuaatigineqareersutut *Immersoqatigiiffiusumik isummersoqatigiinnej* sammisassatut toq-  
qarneqarsimasut salliutillugit misigisimasanik aamma misilittakkanik avitseqatigiinnermut periut-  
situt atorneqarsinnaavoq. Periutsip atunnginnerani suut paasisaqarfigerusunnerlugit aamma  
paasineqartut sumut atorneqassanersut eqqarsaatigineqariissapput. Tamatum ariatigut paa-  
serusutap qanoq suleqatigisanit attuumassutilinnit atorneqarsinnaangorsinnaanera, taamalu  
inuaqatigiinnut iluaqtaasunngorlugu, eqqarsaatigineqassaaq.

Pingaaruuteqarpoq ilisimalikkat *Immersoqatigiiffiusumik isummersoqatigiinnermi* avitseqatigiis-  
sutigineqartut attaqqineqarnissaat. Paasissutissanik pissarsiffiit namminnej inuttut oqaluttuari-  
vaat, taamalu sammineqartoq pillugu ataatsimoortumik ilisimasaqalersitsisuulluni. Taamaattu-  
mik itisiliiluni ilisimatusarnerni tamani, aamma ilisimatusarneq tamaat isigalugu ileqqorissaarnis-  
samut malittarissat assingi atuupput.

Ilisimatusartut suliniutip imaluunniit akuliuffiginninnerup aallartitsarnerani tamatigut suleqatis-  
sarsioreriaqarput, sammisaq pineqartoq pillugu innuttaasunik aamma inunnik pingaarutilimmik  
inissisimasunik oqaloqateqarnermikkut peqataatsiffsiumik sulineq ingerlallugu.

Peqataasunut sammisumik suliaqarneq innuttaasunit tunngavilimmik ilisimatusarneq pillugu  
allaaserisanit (Minkler and Wallerstein, 2008), misissuinermi inerniliussanik atuisussanut ima-  
luunniit peqataasunut namminernut akisussaaffimmik inissiisumik, tunngaveqarpoq. Suleqataa-  
sunik aamma peqataasunik namminernik oqaloqatiginninnerup misissuineq innuttaasut pisaria-  
qartitaannit aallaaveqalersissavaa, aamma misissuinerup- imaluunniit suliniutip inernerata pit-  
saasusianik kiisalu tutsuiginassusianik qaffasinnerulersitsissalluni, taamalu iluatsittumik atorne-  
qarsinnaaneranut annertunerulersitsilluni. Taamaattumik aamma suliap ingerlanneqarnera ta-  
makkerlugu, aallaqaqqaataaniit naammassinissaata tungaanut, peqataasunut sammisumik suli-  
nissaq pingaaruuteqarpoq. Elizabeth Rink aamma Gitte Adler Reimer Tróndheim ilisimatusartu-  
nut, Kalaallit Nunaanni ilisimatusarnermik ingerlatserusuttunut, suleqatigiinneq aamma naliqil-  
luni suleqatigiinneq aqqtigalugit atortussanik ineriertortitsimapput (Rink and Reimer Trónd-  
heim, 2019).

*Immersoqatigiiffiusumik isummersoqatigiinnerit* ilutsimikkut nikerartuupput, kisianni periutsip  
tunngavii siunertaalu isiginiassallugit pingaaruuteqarpoq. Taamaattumik periutsip atornissaa sooq  
sulinummut tulluartuunersoq, aamma peqataasut isummersuutaat sammineqartup ineriertor-  
teqqinnejarnissaanut qanoq tapertaasinnaanersut eqqarsaatigineqassasut inassutigaarput.

*Immersoqatigiiffiusumik isummersoqatigiinnerut* piareersaatit ilisimatusarluni periutsinit allanit  
allaanerunngillat, sumiiffissamik toqqaanissaq, peqataasussanik pissarsiniarneq, annertussused,  
ataqatigiissaarineq allallu ilisimatusarnermi apeqquitit, ileqqorissaarneq aamma suliap ataqtati-  
giinera tunngavigalugit aalajangerneqassallutik. Isumaliutiginninnerit taakku sulinummi sule-  
qatigisat peqatigalugit pisariaqarpoq, suut piviusunngorsinnaanersut, suut naleqquttuunersut  
aamma suut immikkut eqqumaffigineqartariaqarsinnaanerannik isummat pissarsiariniarlugit.

Upernavimmi aamma Qasigiannguani *Immersoqatigiiffiusumik isummersoqatigiinnerit* (Olesen et al., 2020a, Olesen et al., 2020b) ingerlanneqarsimasut piareersarneranni ilisimasavut, peqqisutsimik ukiorpassuarni ilisimatusarnermi misilitakkavut, aamma allaaserisat plusut tunngavigalgit ilusaa ineriertortippalput. Paassisutissanik pissarsiffit attavigineqarnerminni aperineqarput sammisaq aalajangersimasoq pillugu ataatsimoorluni oqaloqatigiinnissamut peqataarusunnersut. *Immersoqatigiiffiusumik isummersoqatigiinneq* ingerlatarput paassisutissanik pissarsiffit aamma aqutsisoq, peqataasut qassiugaluarpatluunniit, iloqqasunngorlutik issiallitik aamma imminnut isigalutik ingerlanneqarpoq. Tamatuma kingorna sammineqartussaq pillugu, aamma qanoq ingerlanneqassanersoq pilligit paassisutissanik pissarsiffit oqaluttuunneqarput. Nassui- aatigineqarpoq paassisutissanik pissarsiffit namminneerluinnarlutik suna, aamma qanoq anner- tutigisumik avitseqatiginnikusunnerlutik aalajangersinnaagaat, aamma oqaluttuarineqartut ta- marmik eqqortuusutut eqqortuunngitsutulluunniit isigineqassangitsut, kisiannili manna amma- sumik avitseqatigiiffiussasoq. Tamatuma saniatigut ilaasa pineqartut tamakkerlugit oqaassis- qarfiginnigmatigit aamma ataqqineqarpoq.

## PIAREERSAATIT – TULLERIIAAQQISSAAKKAT

- Peqataasut attavigineqarput, misissuinerlu pillugu paasitinneqarlutik. Ataatsimoorluni oqaloqatigiinnissamut, *Immersoqatigiiffiusumik isummersoqatigiinnerut*, qaaqquneqarput.
- Ini/sumiiffissaq attartorneqarluniluunniit atorneqarpoq. Ini angisoorsuuusariaqanngilaq, mikinerusinnaallunilu imminnut qanilluni pisinnaalluarpoq. Tamanna soqutaavallaan- ngilaq, tassami paassisutissanik pissarsiffit akornanni inissaq pilersinneqartarmat. Peqataasussatut ilimagineqartunut tamanut naammattunik issiaveqassaaq.
- “Oqalunnermi tigummiartagaq” suliarineqassaaq, pisiarineqassaaq imaluunniit nassaarineqassaaq. Issoqqaarissunngorlugu (terning) puisip amianik suliaq oqalunnermi tigummiagassatut toqqarparput, eqqarsaatigigatsigu puisip amia ilisarnartuusoq, aamma tigummiarnissaaq peqataasunut toqqissisimanartuusoq.
- Peqataasussat takkunnissaannut tii/kaffi aamma tamassiuusamerngit piareersimatinnissaat pitsaasuuvooq.
- Issiaviit iloqqasunngorlugit iliorarneqassapput. Issiaviit akorngi annikitsunnguamik, kisianni assigiimmik ungasissusilimmik, sanileriissillugit (assi takuuk).
- Peqataasut issiavigerusutaminut ingiinnarsinnaapput.



## PERIUTSIP IMMIKUUALUTTORTAI


*Immersoqatigiiffiusumik isummersoqatigiinnerup* Kalaallit Nunaanni ingerlanneqarnissaanut ilitsersuut immikkuualuttortat sisamat tunngavigalugit nassuarneqarpoq, takussutissiaq 1-imí takuneqarsin-naasunik. Taaku tassaapput: 1) Erinarsorneq qasukkarsaatitut; 2) Aqutsisoq iloqqasumi peqataasutut; 3) Naleqartitanik aallarni-utut oqaluuserinninneq; 4) aamma oqalunnermi tigum-miartakkamik atuineq.

### 1) ERINARSORNEQ QASUKKARSAATITUT

Oqaloqatigiinnissamut qasukkarsaatitut, aamma inip ilua-ni "silaannaap oqinnerulersinnissaa" anguniarlugu erinarsornermik aallartippugut, erinarsorneup kalaallinut tunngatillugu pingaaruteqartorujussuunera pissutigalugu. Nalinginnaasuuvooq inuit aallaqqaammut pissangasinnaane-rat, aammalú katerisimaartut ilisarisimanngisallu akornanni oqalunnissaq ilaasa sungiusimanagu. Taamattumik qasukkarsaam-mik aallartinnissaq isummassarsiatsialavoq. Illeqquotoqqt malillu-git *Immersoqatigiiffiusumik isummersoqatigiinneq* ingerlan-neqaraangat, peqataasut avatangiisillu ataqqiniarlugit, qin-nummik imaluunniit nallittorsiorpalaartumik aallarnerne-qarnissaq pingaarutilimmik inissismasimavoq. Tamanna kalaallisut ingerlanneqarnissaanut tunngatillugu naleqqut-tutut isiginngilarput, oqaluffiup avataatigut innuttaasut qinoqatigiinnermut imaluunniit upperisamut tunngatil-lugu iliuuseqarnernut allanut katersortinnejartarnerat ileqqunngimmat. Tamaattumik uagut *Immersoqatigiiffiu-sumik isummersoqatigiinnissatsinnut* naleqqunnerusumik aaqqiiniarsimavugut, isersimaqataasullu ammartinnissaannut ataatsimoortinnissaannullu erinarsorneq atorlugu. Erinarsoriaaseq Inuttoorneq erinarsoriaasiuvooq killtsisimaarnartorujussuullnilu naleqquttoq, inuiaqatigiit kultu-rianni kalaallit erinarsoqatigiit- aamma tussiaqattaartartut pingaarutilimmik inissimalerneran-nut pissutaqataasimasoq (Musikipedia, 2020). Erinarsornermik aallartinneq pitsasumik kingu-neqarpoq. Erinarsorneq peqataasunut pissusissamisoortutut ippoq, allaat peqataasunit erinar-sertoqarluni. Qasukkarsaatissamik toqqaanissami soorunami sammineqartoq aamma angunia-gaq apeqqutaatinneqassapput.

### 2) AQUTSISOQ ILOQQASUMI PEQATAASUTUT

Erinarsoqatigeerernerup kingorna aqutsisoq *Immersoqatigiiffiusumik isummersoqatigiinneq* aamma oqaloqatigiinnermi sammineqartussaq pillugit nassuaateqarpoq. Aqutsisoq eqimattami peqataasut peqatigalugit iloqqasumi issiaqataavoq. Siunertamut aamma sammineqartussamut tunngasumik aaqqissuussamik sammisassanut najoqqutassamik ineriertortsisoqarsimavoq, pisariaqartitsineq naapertorlugu oqaloqatigiinnerup aqunnissaanut aqutsisup atugaanik, tamatuma saniatigut ammasumik oqaloqatigiinnerullunilu, avitseqatigiinnerullunilu peqataasut akornanni ilinniarfigeqatigiinneruneruovoq. Aqutsisoq nammineq kalaaliuovoq, aamma *Immersoqati-giiffiusumik isummersoqatigiinnerit* tamarmik kalaallisut ingerlanneqarlutik.



### **3) NALEQARTITANIK AALLARNIUTITUT OQALUUSERINNINEQ**

*Immersoqatigiiffiusumik isummersoqatigiinneq aallarnerlugu paasissutissanik pissarsiffiit namminneq naleqartitaannik oqaluuserinnissasut qinngialugit aallartissalluta toqqarparput. Oqaloqatigiinneq inunnut namminernut aamma inuit ataatsimoorutigisinhaannik tunngaveqassasoq kissaatigaarput. Taamaaliornikkut aallarniutitut paasissutissanik pissarsiffiit eqqarsaatiminnik ammasumik oqaluuserinninnissaat takorloorparput, tamannalu allanut siullermeirluni oqalunniassamut immaqa apeqqutinik aalajangersimasunik akinissamit ajornannginnerussalluni. Tamatuma kingorna misissuinermi sammineqartut aalajangersimasut aamma sammineqartussatut toqqakkat oqaloqatigiinnermi sammineqarput. Ilaatigut aqutsisup nammineq naleqartitani siuliulluni oqaluttuarivai, ilaatigut oqaatigineqareersutut eqimattat naligalugit peqataaniarluni, aamma ilaatigut oqaloqatigiinnerup ilusilernissaa siunertaralugu.*

### **4) OQALUNNERMI TIGUMMIARTAGAQ**

Ileqqutoqqat malillugit *Immersoqatigiiffiusumik isummersoqatigiinnermut oqalunnermi tigumiartagaq ilaatinneqarpoq, aammalu eqimattami kina oqaluttussaanersoq erseqqissaataaqataalluni. Paasissutissanik pissarsiffiit oqalunnermi tigummiartagaq tigummiarsinnaavaat, akornuersorneqaratillu oqalullutik, aamma naammassigunik namminneq ingerlateeqqissallugu. Tamanapaasissutissanik pissarsiffiup eqqarsaatiminik itisiliisinnaanissaanik pilersitsisinnaavoq, allat tullinnguutinnginneranni suna pinerlugu tuaviorluni oqaatiginiassallugu pisariaqarani. Tamanna paasissutissanik pissarsiffiit allat akornanni ataqqinninnermik aamma malinnaanermik pilersitsivoq. Nalinginnaasumik oqaluttut tulleriaarnerat iloqqasoq malillugu ingerlanneqartarpoq. Taamaallluni oqalunnermi tigummiartagaq sanilerisamut ingerlateeqqinnejqartarluni, iloqqasumi peqataasut tamakkerlutik oqaaseqarnissamut periarfissinnejqarnissaasa tungaanut. Tulleriaarnermi oqaaseqarusunngikkaanni oqalunnermi tigummiartagaq allamut ingerlateeqqinnaassallugu periarfissaqartuaannarpooq. Oqalunnermi tigummiartagaqartarneq Kalaallit Nunaanni ilisimane-qanngilaq, taamaattumik uagut ilusilersukkatsinni qanoq imaluunniit ilumut atussanerlugu eqqarsaatersuutigivarput. Aalajangerpugulli misilissallugu.*

Periuseq peqataasunit sungiunneqapallappoq, aammalu atornerani tunnusimanerujussuarmik takutitsillutik. Oqalunnerminni tigummillugulu eqittarpaat, aammalu naammassigaangamik ingerlateeqqittarlugu.

**”Isumaqarpunga nuannersuusoq taanna ‘oqalunnermi tigummiartagaq’ atorlugu, uangami nammineq kuglepeni atortarpara – peqataasoq**

Oqalunnerup nalaani tigummiaqarneq eqqisisitsillunilu toqqisisitsisoq takuarput. Tamanna tamanit sungiunniarneqaqqaalaarpooq, kisianni periutsimut ilanngussaq pitsaalluinnarpooq, aammalu inip iluani nukimmik pitsaasumik pilersitsilluni.

## ATORNISSAANUT ILITSERSUUT – TULLERIAAQQISSAAKKAT

- Tamakkerlutik ingippata aammaarluni tikilluaqqusisoqassaaq
- Oqaloqatigiinnermi sammineqartussaq paasissutissanik pissarsiffinnut nassuaatigiuk
- Ini “ammarsarlugu” qasukkarsaammik aallartigit. Sammineqartoq tunngavigalugu qasukkarsaatisaq toqkaruk.
- Oqalunnermi tigummiartakkap siunertaa atornissaalu nassuaatigiuk. Oqalunnermi tigummiartagaq iloqqasup iluani arlaata tungaanut ingerlateqqinnejassaaq. Sammineqartup ingerlanerani tamarmik oqalunnissaminut periarfissinneqassapput.
- Oqaluuserisassaq aallarnerlugu sammineqartussaq ilisaritillugu aqutsisoq aallartippoq, imminullu aallarniutigaluni (naleqartitat oqaluuseralugit aallartippugut). Tamanna oqalunnermi tigummiartagaq tigummillugu pissaaq. Tamatuma kingorna aqutsisup saniliminut, sammivittut toqcarneqartoq malillugu, ingerlateqqippaa.
- Paasissutissanik pissarsiffiit oqaluttuussaarunnissaasa tungaanut oqalunnermi tigummiartagaq ingerlaartinneqassaaq. Piffissap ingerlanerani pisariaqassappat aqutsisoq itisileeq-qusilluni apeqquteqarsinnaavoq. Pisariaqassapput iloqqasup qasseriarlugu kaajallannis-saa killilerneqarsinnaavoq (ass. pingasut) imaluunniit piffissalikkamik. (Angorusutanut, paasissutissanik pissarsiffiit amerlassusianut aamma siunertamut tunngatillugu piffis-saliisinnaanissamut Immersoqatigiiffiusumik isummersoqatigiinnermi sammineqartoq apeqqutaasinnaavoq.)
- Tamatuma kingorna aqutsisoq nutaanik apeqquteqassaaq, imaluunniit sammisassatut najoqqutaq malillugu sammisamik nutaamik saqqummiussissaaq, aammalu tulleriaarne-rit arlallit ingerlateqqinnejassallutik, oqalunnermi tigummiartagaq tulleriaartinneqassal-luni, apeqqutit ataasiakkaat aamma sammineqartut pillugit peqataasut tamarmik oqaaseqarnissaminut periarfissinneqassallutik.
- Naggasiutit arlaat ilassutissaqarnersoq imaluunniit avitseqatiginnikkusunnersoq apeqqutigineqarsinnaavoq.

# 4. PERIUSEQ PILLUGU ISUMALIUTERSUUTIT

Siusinnerusukkut nassuiarneqareersutut *Immersoqatigiiffiusumik isummersoqatigiinneq ileqqutoqqaavoq aporaaffiunngitsumik attaveqaqatigeeriaasiusoq, iloqqasumi peqataasunut tamanut inissaqartitsisoq, iloqqasumi oqaloqatigiinneq oqallinnissamik tunngaveqannngimmat* (Rothe et al., 2009, Halcomb, 2006, Earth Child Project, 2020).

Periusissatut isumaliutigisavut tassaasimapput ileqqutoqqap *Immersoqatigiiffiusumik isummersoqatigiinnerup* ilai suut kalaallinut tunngatillugu ilisimatusarnermi ataatsimoortitsilluni ilutsimut nuussinnaassanerivut. Eqqumaffigiuarsimavarput iluseq misissuiffigineqartunik ataatsimoortitsilluni apersuinermit sutigut allaanerussuteqarnersoq, imaluunniit allaanerussuteqannginnersoq. Isumaqarpugut allaaserinninnernut tunngasorpiatigut misissuiffigineqartunik ataatsimoortitsilluni apersuisarernut nalinginnaasunut ilaatigut sanilliunneqarsinnaasoq, kisiannili aamma pingaarutilinnik assigiinngissuteqartoq, pingartumik kulturikkut naleqquttuuneranut tunngatillugu. Periutsip ilusaata kalaallit kulturikkut nakuussutaasa oqaloqatigiinnermi qitiutinneqarnisaat pisinnaanngortippaa, aammalu oqaloqatigiinnerup ilusaata pisinnaalersippai akuutitsineq, oqaloqatigiinneruneq, ataqqinninneq aamma naligiinneq. Oqaloqatigiinneq aammattaaq peqataasut akornanni eqqarsalersitsillunilu kinguneqarluarsinnaasunik isumassarsisitsivoq.

Oqaloqatigiinnerup ilusaata peqataasut toqqissimalersikkaat, aamma aqutsisup apeqquataanik akiinnarnermut taarsiullugu oqaloqatigiinnermut akisussaaffimmik tigusillutik imminnut oqaloqatigiittut takuarput, tamannalu oqaloqatigiinnermik uummaarissumik pilersitsivoq.

Takusatta pingarnerit ilaat tassaavoq aqutsisup atuuuffiata pingaruteqassusia. Misilittagaqarluartumik aqutsisoqarneq, peqataasut kulturiannik oqaasiinillu atuisumik, oqaloqatigiinnermut pilersinnejartumut pingaarutilittut malunniuteqarpooq (Halcomb, 2006). Tamanna allanut tunngatillugu ilanngullugu eqqarsaatigeqqunarpooq. Curtisip (inuttaanit paasitinneqarneq) oqarneratut immaqa nammineq tunuliaquttani imaluunniit inissisimanini uummaarissumik oqaloqatigiinnissap ajornakusoorneranut pissutaasimasoq, peqataasut pissutaanatik. Tassa misissuiffigineqartunik ataatsimoortitsilluni apersuinissamik imaluunniit *Immersoqatigiiffiusumik isummersoqatigiinnissamik* pilersaarusroriaanni taava aqutsisup misilittagai aamma kulturikkut aallaavia misissuinerup pitsaassusianut aamma periutsip atorsinnaassusianut pingaruteqartorujussuupput.

Oqaatsit, ilisarnaatit, pingaruteqassuseq aamma ilisimasat tassaapput nunat inoqqaavisa ilisimatusarfigineqarneranni innuttaasunit aqunneqartumik imaluunniit qanumut suleqatigalugit pinissaata pingaruteqassusianut tunngatillugu allaaserisani uteqattaarneqartut. Techine et al., (2016) erseqqissarpaat itisiliilluni misissuinerni "paasissutissat pitsaasut" pissarsiarinissaannut nunat inoqqaavisa namminneq aqutsisutut imaluunniit paasissutissanik pissarsiffittut inissisimanermanni qanoq namminneq misigisaminnik aamma isummersuutiminnik misissueqqissaarnermut aamma nalunaarutiginninnermut pisariaqartinneqartumik paasisimasaqartiginerat (Tachine et al., 2016). Taamaattumik ilisimatusarnerni aamma akuliuffiginnilluni suliaqarnerni imminnut tunngasuni nunap inoqqaavi naligalugit suleqatitut pineqarnissaat pingaruteqarpooq (Cueva et al., 2021, United Nations, 2007). *Immersoqatigiiffiusumik isummersoqatigiinneq* pillugu siusinnerusukkut misissuinernit misilitakkat aamma allaaserinninnerit plusut periutsip peqqissutsimik

ilisimatusarnerup iluani atorneqarsinnaanera uppermarsarpaat (Olesen et al., 2020a, Graham-slau and Henson, 2015, Kelley and Lowe, 2018, Struthers et al., 2003). Taamaattorli aammaarluni pingaaruteqarpoq misissuinerup annertussusia kisiat pinnagu kimit ingerlanneqarnera eqqumaffigissallugu.

Peqataasunit aallaavilimmik aamma *innuttaasunit tunngavilimmik* sulineq kalaallinut tunngatil-lugu nakooqqutaavoq, tatiginassutsimik innarligassaannngissusermillu pilersitsiviusoq, ilisimatu-sarneq inuit ilisimatusarfigineqartut naligalugit ingerlanneqarmat. Innuttaasunit tunngavilimmik sulineq naliqimmik atassuteqarnermik ineriertortitsinissamik imaqartorujussuuvoq. Aammat-taaq inunnut imaluunniit eqimattanut ilisimatusarnermut ilaasunut ilikkagaqarnissamut, ataq-qinninnermut aamma maniguunnermut tunngavoq. Community-based participatory methods (CBPR) Rink aamma Reimer Trondheimimit (2009) Kalaallit Nunaanni ilisaritinneqarpoq, periut-sip inuiaqatigiinni kalaallini sammineqartunik, naleqartitanik, ilisimasanik aamma inuunermik isiginnittaatsimik qanoq pitsaanerusumik pilersitsineranik nassuaataalluni. Ilutigisaanik taakku nassuiarpaat siornatigut pisartunik CBPR qanoq nalilersuinersoq, misissuinerit nalinginnaasumik najukkani ataasiakkaani innuttaasut oqaloqatigeqqaarnagit, aamma inerniliussat pillugit kingor-natigut oqaloqatiginagit ingerlanneqartarsimallutik. Periuseq taanna pisuni arlalinni ilisimatusar-nerni inerniliussanik piviusumi takusanit allaanerusumik inerneqartitsivoq, taamaattumillu aam-ma innuttaasut pissarsissutigingisaannik ilisimatusarnerulluni (Rink and Reimer Trondheim, 2019, Rink et al., 2009).

Ataatsimoorluni ilikkagaqarnissamik siuarsaaniarneq, aamma ilisimatusarnikkut periutsimut kulturikkut nakooqqutit aamma naleqartitat tunngaviusut ilaatinne, inerniliussat atorsinnaasut pilersinnissaannut aamma siunissami Kalaallit Nunaanni peqqissutsimik ilisimatusarnerup ataatsimoorussamik siunnerfilimmik pilersinnissaannut annertunerujussuarmik periarfissaqartitsivoq. Neriuppugut periutsimut najoqqutassaq una tamatumunnga tapertaasinnaassasoq.

Naggasiutitut peqataasut aperivagut *Immersoqatigiiffiusumik isummersoqatigiinnermut* peqa-taanertik, aamma taamatut oqaloqatigiainnertik qanoq isumaqarfingeraat. Pingaarutillit arlallit tamatumunnga akissutigineqarput:

” Iloqqasunngorluni issianeq iluarisimaarnarpoq. Taamaaliornikkut paasisaqnarnerullunilu tusarnaarluarnarneruvoq

” Nunaqqatinnut ammasumik oqalussinnaasimavunga, aammattaaq allat tusarnaarsinnaasimallugit. Aamma ilisimasaqalerpunga

” Nutaanik isiginnittaaseqalerpugut

” Maaniinnera nuannaraara, namminerlu pissarsiaqaatigalugu

” Qamani [sakissaminut tikkuarluni] nalituumik pigisaqarlunga maanngaannit anissaanga

Tassa allat isumaannit aamma isummersuutaannit nammineq ilikkagaqarfiusumik oqallinnermut peqataasimallutik peqataasunit oqaatigineqarpoq, taamaaliornikkullu isummersuutinik allanik peqalerluni angerlarnissaq misigineqarluni.

# 5. EQIKKAANEQ

*Immersoqatigiiffiusumik isummersoqatigiinneq peqataatitsiffiulluni aamma aporaaffiunngitsumik itisiliilluni misissuiffigineqartunik ataatsimoortunik apersuinerterik tunngaveqarluni ilisimatarsnermermi paasissutissanik katersuinermut periusuivoq pisariitsunnguaq, aamma meeqqat, inuu-suttut utoqqaallu akornanni atorneqarsinnaasoq. Ammasumik oqaloqatigeeriaaseq pineqarpoq, peqataasut tamarmik eqqarsaatiminnik aamma isummersuutiminnik avitseqatiginnissinnaaner-minnut periarfissaqarlutik, aamma kalaallinut tunngatillugu oqaluttuarnerup pingaaruteqassusianik akuersaartuulluni.*


Misilitakkat najoqqtassiami matumani nassuaatigineqartut, siusinnerusukkut misissuinerit kii-salu allaaserisat uppernarsarpaat oqaloqatigiinneq tunngavigalugu aamma kulturikkut naleq-quttimik Kalaallit Nunaanni siunissami peqqissutsimik ilisimatusarnermut periutsip siuarsataanissaanik periarfissaqartoq (Olesen et al., 2020a, Grahamslaw and Henson, 2015, Kelley and Lowe, 2018, Struthers et al., 2003).



# NAJOQQUTAT

- Ⓐ BERLINER, P. & STENDER, A.-K. 2013. Glæde og Styrke - En undersøgelse af værdier hos ældre mennesker i Paamiut *Psyke & Logos*, 34, 559-575.
- Ⓐ CUEVA, K., RINK, E., LAVOIE, J. G., STOOR, J. P., HEALEY AKEAROK, G., GLADUN, E. & LARSEN, C. V. 2021. Diving below the surface: A framework for arctic health research to support thriving communities. *Scandinavian Journal of Public Health*, 14034948211007694.
- Ⓐ CURTIS, T. 2001. *Kommunikation mellem læge og patient i Grønland-en kvalitativ undersøgelse af interaktionen mellem parterne i den tolkede konsultationssamtale*, Syddansk Universitet. Statens Institut for Folkesundhed.
- Ⓐ EARTH CHILD PROJECT. 2020. *Guide to Sharing Circles* [Online]. Available: [earthchildproject.org/guide-to-sharing-circles/](http://earthchildproject.org/guide-to-sharing-circles/) [Accessed 05.06.2020 2020].
- Ⓐ GRAHAMSLAW, L. & HENSON, L. H. 2015. Solving problems through circles. *Educational Psychology in Practice*, 31, 111-126.
- Ⓐ HALCOMB, E. J., GHOLIZADEH, L., DIGIACOMO, M., PHILLIPS, J., DAVIDSON, P. M. 2006. Literatur review: considerations in undertaking focus group research with culturally and linguistically diverse groups. *Journal of Clinical Nursing*, 16, 1000-1011.
- Ⓐ HALKIER, B. 2002. Fokusgrupper, Samfundslitteratur & Roskilde Universitetsforlag.
- Ⓐ INUIT CIRCUMPOLAR COUNCIL. 2020. *Inuit - United voice of the Arctic* [Online]. Available: <https://www.inuitcircumpolar.com/about-icc/> [Accessed 19.06.20 2020].
- Ⓐ KELLEY, M. N. & LOWE, J. R. 2018. A culture-based talking circle intervention for native American youth at risk for obesity. *Journal of community health nursing*, 35, 102-117.
- Ⓐ KVALE, S. & BRINKMANN, S. 2009. Interview: *introduktion til et håndværk*, Hans Reitzels Forlag.
- Ⓐ LEXDK. 2020. *Den Store Danske* [Online]. Available: [http://denstoredanske.dk/Sprog\\_religion\\_og\\_filosofi/Sprog/Fremmedord/sp-s%C3%A5symposium](http://denstoredanske.dk/Sprog_religion_og_filosofi/Sprog/Fremmedord/sp-s%C3%A5symposium) [Accessed 2020].
- Ⓐ MINKLER, M. & WALLERSTEIN, N. 2008. *Community-based participatory research for health: From process to outcomes*, John Wiley & Sons.
- Ⓐ MUSIKIPEDIA. 2020. *Grønlands musikhistorie* [Online]. Available: <https://www.musikipedia.dk/groenlandsk-musik/indblik> [Accessed 05.06.2020 2020].
- Ⓐ OLESEN, I., HANSEN, N. L., INGEMANN, C., ARNARULUK, L. & LARSEN, C. V. L. 2020a. Brugernes oplevelse af det grønlandske sundhedsvæsen – En pilotundersøgelse.
- Ⓐ OLESEN, I., HANSEN, N. L., JØRGENSEN, M. E. & LARSEN, C. V. L. 2020b. Perspektiver på genetiske undersøgelser af diabetes, belyst gennem Sharing Circles: En kvalitativ undersøgelse i Qasigiannguit. Statens Institut for Folkesundhed, SDU.

- ◉ PETERSEN, R. 2003. *Settlements, kinship and hunting grounds in traditional Greenland*. Museum, Tusculanum Press.
- ◉ REIMER TRÓNDHEIM, G. A. 2012. Den moderne grønlandske familie. *Tidsskrift for forskning, fagkritik og teoretisk debat*.
- ◉ RINK, E., LAW, D. G., MONTGOMERY-ANDERSEN, R., MULVAD, G. & KOCH, A. 2009. The practical application of community-based participatory research in Greenland: initial experiences of the Greenland sexual health study. *International journal of circumpolar health*, 68, 405-413.
- ◉ RINK, E. & REIMER TRÓNDHEIM, G. A. 2019. A toolkit for Community Based Participatory Research in Greenland. Ilisimatusarfik.
- ◉ RINK, E. & TRÓNDHEIM, G. 2018. Population Dynamics in Greenland
- ◉ ROTHE, J. P., OZEGOVIC, D. & CARROLL, L. J. 2009. Innovation in qualitative interviews: "Sharing Circles" in a First Nations community. *Injury prevention*, 15, 334-340.
- ◉ STEENHOLDT, N. C. 2019. Livsformer og livskvalitet i Grønland: Et indblik i sammenhængen og den potentielle udvikling. *Politik*, 22.
- ◉ STRUTHERS, R., HODGE, F. S., GEISHIRT-CANTRELL, B. & DE CORA, L. 2003. Participant experiences of talking circles on type 2 diabetes in two Northern Plains American Indian tribes. *Qualitative Health Research*, 13, 1094-1115.
- ◉ TACHINE, A. R., BIRD, E. Y. & CABRERA, N. L. 2016. Sharing circles: An Indigenous methodological approach for researching with groups of Indigenous peoples. *International Review of Qualitative Research*, 9, 277-295.
- ◉ UNITED NATIONS 2007. UNDRIP - United Nations Declaration on the Rights of Indigenous Peoples. United Nations.
- ◉ WISTOFT, K. 2009. *Sundhedspædagogik - viden og værdier*, Hans Reitzels Forlag
- ◉ WISTOFT, K. 2012. Værdier og mening med sundhed In: SIMOVSKA, V. & JENSEN, J. M. (eds.) *Sundhedspædagogik i sundhedsfremme*. Gads Forlag.



Innutaasut Peqqissusiannik Ilisimatusarfik • Center for  
Folkesundhed i Grønland • Centre for Public Health in Greenland